

Htawm tem' ri tuil' ri muk kon' Hkrit Kaw'rinhtu' ok' leual'

¹ Htawm ti ok' aen' na ko', meuh ui' Paw'lu meuh peue caee Eun Yesu' Hkrit hot' alo Eun Peucawo' na' maeé' Ti'mo'se awng' ui' na' ya.

Ya tem' ri tuil' a ri muk kon' Hkrit Eun Peucawo' ut' nang veng Kaw'rinhtu' na' maeé' peue Eun Peucawo' ut' nang kuing' Ahkaiya' na' pé' gawm'euc'.

² Kah mun' sin' maeé' hk'a' kuit nyawk' kuit sam'ran cumyen' lih neum Kuing' Peucawo' e' na' Eun maeé' neum Cawo' Yesu' Hkrit Eun na' kue' ri pé' reu'.

Peucawo' Cawo' yeuh hk'a' kuit nyawk' kuit sam'ran ku ceu gawm'euc' na' Eun

³ Suk'seun' Peucawo' meuh Kuing' Eun Cawo' Yesu' Hkrit e' na' Eun. Eun meuh Kuing' ka hk'a' tukyak na' maeé' Eun meuh Peucawo' Cawo' yeuh hk'a' kuit nyawk' kuit sam'ran ka ku ceu gawm'euc' na'. ⁴ Punta kaw e' cang yeuh peue pun ri hkam' hk'a' tukhka na' ce kuit nyawk' kuit sam'ran ri cu e' hk'a' kuit nyawk' kuit sam'ran pun e' ri rap ri ti neum Peucawo' Eun na', Eun yeuh e' kuit nyawk' kuit sam'ran hk'a'naee hk'a' tukhka gawm'euc' e' na'. ⁵ Kopti hk'a' tukhka e' hk'a'naee Hkrit Eun na' a lawn gawm heun' ko', hk'a' yeuh hk'a' kuit nyawk' kuit sam'ran e' na' a ku kaw baet ri heun' kopti Hkrit Eun yeut. ⁶ Ya lawn pun ri hkam' hk'a' tukhka na' ko', a meuh punta kaw pé' pun hk'a' kuit nyawk' kuit sam'ran maeé' hk'a' htut lawtpon na'. Ya lawn pun hk'a' kuit nyawk' kuit sam'ran na' ko', a ku meuh punta kaw pé' pun hk'a' kuit nyawk' kuit

sam'ran na' yeut. A kaw yeuh pe' cang yeun'hkam hk'a' tukhka na' seun' pun ya ri hkam' a na'. ⁷ Keutui' hpum' ya pe' na' keutawn' seupit, kopti yawng ya pe' lawn pun ri pawng' ri hk'a'naee hk'a' tukhka ya na' a'neng ko', pe' ku na' pun ri pawng' ri hk'a'naee hk'a' kuit nyawk' kuit sam'ran ya na' peunaw' yeut.

⁸ Ec'awng' na' pe', sum' kah ya pe' yawng lawng hk'a' tukhka pun ya ri hkam' nang kuing' Asa' na'. Ya pun ri hkam' hk'a' geut'nuic na' rot ti kaw ya hkam' un' laee pun a. Ya hteum' a'yu ri na' kaw un' laee lawtpon. ⁹ Neumneum ka na' ko', hteum' ya ri rot htan kaw yeum na' hawc'. Daecti meuh a yeuhki' na' a meuh punta kaw ya un' papuing jawngku' tu' ri na' meun, daecti ya papuing Peucawo' Cawo' yeuh peue yeum ce tang kuh' im' na' Eun. ¹⁰ Eun yeuh ya lawtpon hk'ai' htan kaw yeum na'. Eun ku kaw' kaw tang teum'kawm ya bae yeut. Ya keutui' hpum' Eun kaw suip ri teum'kawm ya heul' bae ¹¹ seun' teum'kawm pe' ya ri leukah' hk'o' mun' pe' na'. Yeuh keutit' na', kopti meuh a ya ri, peue heun' na' peue kaw mun' keuting ri Peucawo' Eun. Aen' a meuh hk'a' tukyak Eun Peucawo' tuil' Eun a ri ya, a meuh hk'a' top' Eun leukah' hk'o' mun' ce peue heun' na'.

Paw'lu plin' eun hk'a' kan'

¹² Ku' cang mhawng' ya ri hk'o'cuin na' meuh a hpum' cang yawng ya na' hkam' a sa'hki' a'yu im' ya pang bhen' keute' na' ri hk'a' seunga' chak' na' mae' ri nang puin ka hpum' lih neum Peucawo' Eun na'. Lheu' awn' na a meuh hk'a'naee vang yeuh ya a'mawo pe' na'. Ya hkuin' a'yu im' hot' cu'yi ka bhen' keute' na', daecti a'yu im' ya hot' mun' Eun Peucawo' na'. ¹³ Kopti hpaw ya ca' tem' ri tuil' ku' kaw pe' lip un' pun leuceng un' pun na' ri pe'. Keutui' hpum' ya ¹⁴ kopti leuceng pun pe' ku' ti ri ceu na' hawc' na', pe'

ku na' leuceng pun a meulamlam ri hk'a'naee seunyi Eun Cawo' Yesu' na' seun' mhawng' ya ri hk'o'cuin hk'a'naee pe' ri na', pe' ku na' cang mhawng' ri hk'o'cuin hk'a'naee ya ri pun yeut.

¹⁵ Kopti yum' ui' lawng aen' ce meulamlam ri na', punta kaw pe' pun mun' na' lal' pun na', ui' raen hk'a' kan' kaw ri ing' pleh glue ri pe' nanggal'. ¹⁶ Ui' raen hk'a' kan' na' yeuhki', yam heul' ui' kuing' Masido'ni' na', ui' na' ing' ba' ri veh pleh glue ri pe', hk'a' keutah ing' ui' neum kuing' Masido'ni' na' ui' ku na' tang ing' ba' ri veh pleh glue ri pe' bae. Hawc' ka na', pe' na' ing' tuil' ui' nang kuing' Yu'da. ¹⁷ Yam raen ui' hk'a' kan' yeuhki' na', un' yeuh ui' a rot nang puin ka hpum' ri na' aw? Ui' raen hk'a' kan' na' seun' ku' yeuh ce peue bhen' keute' na', "ing' ui'" mae' "un' ing' ui'", ui' lah' ri tec hk'o'hk'awng' a aw?

¹⁸ Daecti Peucawo' Eun ci' kati keutawn' yeuh sa'nhaw' na' ko', leukah' ui' na' "ing' ui'" mae' "un' ing' ui'" na', hpaw ui' ca' lah' ri tec hk'o'hk'awng' a. ¹⁹ Kopti Kon' ai' Eun Peucawo' Yesu' Hkrit ku' ui' ri, Silas' mae' Ti'mo'se pa' ris ye lawng Eun na' ri pe' na' Heun ri, "meuh neum" mae' "un' meuh neum" na' a hkuin' cang meuh. Daecti hk'a'naee Heun ri na', saec' yamnhaw' "meuh a neum". ²⁰ Kopti Peucawo' Eun saec' na' yeuh kati ri na' heun'heun' a'ngeng ko', kati aen' ce "a meuh neum" gawm'euc' hk'a'naee Hkrit Eun. Kop awn' na, punta kaw e' tuil' munhpung' ri Peucawo' Eun na', e' lah' "Amin" ri cu e' Yesu' Eun na'. ²¹ Peucawo' yeuh Eun ye ri mae' pe' ri e' keutawn' hk'a'naee Hkrit Eun. Eun leuk ri ti e'. ²² Eun tawk' ta'ra' ri e', a meuh sa'hki' ka meuh Eun Cawo' e' na'. Punta kaw a htawhkam ku' kaw ing' na', Eun tuil' Cit' seung' ri na' hk'a'naee hpum' e' na'.

²³ Hk'o' ui' Peucawo' Eun meuh sa'hki' ka ri ti un' lae ing' ba' ui' ri veh nang veng Kaw'rinhtu' na' a meuh kopti

un' sum' kah uí' pe' kuit nyhap' na'. ²⁴ Hpaw ya cá' meuh cawó' u'peung hk'a' yum' pe' na'. Daecti punta kaw pe' pun ri rap hk'a' ren'kawn na', ya reurao yeuh kan' na' maeé' pe', kopti hk'a' yum' pe' na' keutawn' ka na'.

2

¹ Kop awn' na, uí' kuit a deut kaw uí' un' laee ing' ba' ri veh yeuh pe' kuit nyhap' baeé' ti pok. ² Kopti uí' lawn yeuh pe' kuit nyhap' ko', a cí' kaw vang a'nhaw' yeuh uí' ren'kawn? Vang a pal ku' yeuh uí' pe' kuit nyhap' na' pe' palkoe. ³ Tem' uí' ri tuil' htawm ri pe' yeuhki' na' a meuh punta yam tang ing' rot uí' ri pe' na' peue htuk' ri yeuh uí' ren'kawn awn' kaw ce un' cang yeuh uí' hpum' lu na'. Uí' yum' hk'a' ren'kawn uí' na' a ku meuh hk'a' ren'kawn pe' na' yeut. ⁴ Kopti tem' uí' ri tuil' htawm ri pe' hk'a'naeé' vang kuit nyhap' hpum' sui' nyawk' uí' na' maeé' leuum' ngai' peuc' ri na', a hkuin' meuh punta kaw uí' yeuh pe' kuit nyhap', daecti a meuh punta kaw uí' yeuh pe yawng leumeus' uí' pe' pe a'neng na'.

Ploe' map' nang yeuh ku' kleuc'

⁵ Peue ti ri peue eun lawn yeuh map' na' yeuh peue kuit nyhap' ko', hpaw eun cá' yeuh uí' kuit nyhap', daecti koe yeuh eun pe' kuit nyhap' hk'o' ri gawm'euc'. (Lah' uí' koe hk'o' a ri na' a meuh kopti un' sum' lah' reng uí' a ri heun na'.) ⁶ Hk'a'naeé' pe' hk'a' heun' ciyang pe' eun na' hk'o' ka hawc'.* ⁷ Kop awn' na, punta kaw eun un' laee gawm kuit nyhap' na', pe' na' htuk' ri ploé' map' eun, yeuh eun kuit nyawk' kuit sam'ran. ⁸ Kop awn' na, uí' hk'o'hk'ang pe' yeuh eun yawng leumeus' pe' eun neumneum na'. ⁹ Tem' uí' ri tuil' htawm ri pe' na' meuh a kopti punta kaw uí' caet ri nawk tup leuceng pe' ri ti leukah' uí' na' ku moeng ka aw.

* 2:6 2:6 1 Kaw'rinhtu' 5:1

¹⁰Pe' lawn ploé' map' á'nhaw' ko', uí' ku kaw ploé' map' eun hkawn' a yeut. Uí' lawn ploé' map' ná' ti ri ceu ko', ploé' uí' a kopti meuh a pe' ri nanggal' Eun Hkrit ná'. ¹¹Aen' meuh a punta Satan ná' kaw a un' cang pe e' ná', kopti yawng e' kamkuit vok' ka ná'.

Paw'lu hpum' un' sam'ran eun nang veng Tro'as'

¹²Punta kaw uí' heul' sangsawn' leukah' mun' ren'kawn lawng Eun Hkrit ná', yam rot uí' nang veng Tro'as' ná', uí' pun ri yawng Peucawo' tuh' Eun hk'a' kaw uí' yeuh kan' ná' hawc'. ¹³Daecti kopti un' pun uí' ri hk'eup' Ti'tas' awng' uí' ná' eun teh' ná', hpaw uí' ca' lae kue' hk'a' kuit nyawk' kuit sam'ran cumyen' hk'a'naee hpum' ri ná'. Kop awn' na, uí' gah' hk'ai' ec'awng' ná' ce, uí' ing' nang kuing' Masido'ni' ná'.

Meuh cawo' pe hk'a'naee Hkrit Eun

¹⁴Daecti ya mun' keuting ri Peucawo' Cawo' teuk' va e' hk'a'naee vang pe ná' hk'a'naee Hkrit Eun laleung. Eun yeuh aí' hom' ka cú'yi ri ná' muit' heul' ku duih' ri cu Eun e' ná'. ¹⁵Kopti meuh e' aí' hom' Eun Hkrit ku' tan Eun ri Peucawo' Eun ná' hk'a'naee muk ce peue rang ri kaw pun hk'a' htut lawtpon ná' mae' muk ce peue rang ri kaw pun hk'a' lulaic heul' ná' ce. ¹⁶A meuh aí' ka hk'a' yeum ná' pun ku' ti muk ná' ce, daecti pun ku' ti muk ná' ce a meuh aí' ka hk'a' civit ná'. Á'nhaw' cí' kaw kuing' ri yeuh kan' yeuhki' ná'? ¹⁷Kopti hpaw ya ca' seun' peue heun' ná' ce. Ce ri, heul' paing' ce ri hk'a' leukah' Eun Peucawo' ná'. Daecti ya ri, ya sangsawn' a ri cu ya Hkrit Eun ná' seun' meuh ya peue kati keutawn' ná', seun' meuh ya peue lih neum Peucawo' Eun ná' mae' seun' meuh ya peue ut' nanggal' Eun Peucawo' ná'.

3

Peue yeuh kan' ka kati sat'ca' hk'u'

¹ Ya ri, buih suk'seun' meun ya tu' ri na' bae aw? A'ko' seun' ya peue seubu ku' lo' htawm htawhkam neum pe' ri na', a'ko' htawm htawhkam kaw heul' ri pe' na' aw? ² Pe' ri, meuh pe' htawm ya. A tem' ri ri meul' bhum' ya na'. Peue gawm'euc' na' peue pun ri yawng pun ri lip a. ³ Meuh pe' htawm Eun Hkrit na', pe' yeuh a pucti lih hawc'. Aen' a meuh pli' ka kan' ku' yeuh ya na'. A hkuin' tem' ri ri lamuik', daecti a tem' ri ri Cit' seunga' Eun Peucawo' Cawo' a'yu im' na' Eun. A hkuin' tem' ri pang meul' seumu na', daecti a tem' ri ri meul' bhum' peue na'.

⁴ Ya yum' a neumneum yeuhki' hk'a'naee Hkrit Eun nanggal' Eun Peucawo' na'. ⁵ Kopti ara chanan ya na' ya yeuh ceu nang aen' ce pucti lih na', a hkuin' yeuh keutit'. Daecti ara chanan ya na' lih a neum Peucawo' Eun. ⁶ Eun tuil' ya ara chanan kaw ya meuh peue yeuh kan' ka kati sat'ca' hk'u' na'. Aen' a hkuin' meuh kati sat'ca' ka tu' htawm ka leukah' ritroe tem' ri na', daecti a meuh kati sat'ca' ka Cit' seunga' na'. Kopti leukah' ritroe na' toh a a'yu, daecti Cit' seunga' na' a tuil' civit na'.

Munhpung' ka kati sat'ca' hk'u'

⁷ Ritroe cang yeuh peue yeum ku' tem' ri tawk' ri ri glawk' seumu na' munhpung' ka na' a ceng' til' pucti. A yeuh buh Eun Mo'se na' ceng'. Ceng' awn' a saec' na' baet ti yop heul' ko', daecti peue I'sarelá' na' ce un' cang keue' ri buh eun Mo'se na'. ⁸ Kop awn' na, ku' ceng' ka munhpung' ka Cit' seunga' na' a ci' na' pe ceng' hk'ai' awn' a a'neng? ⁹ Kop awn' na, ku' ceng' ka munhpung' ka hk'a' taws' a'mu kaw pun hk'a' ciyang na' a lawn reng htan' awn' a ko', ku' ceng' ka munhpung' ka hk'a' leupaws seumeu' na' a ci' na' pe reng hk'ai' awn' a a'neng? ¹⁰ Neumneum ka na'

ko', kopti meuh a ku' ceng' reng nyawk' ka munhpung' maet'maen' na' a yeuh ku' ceng' ka munhpung' nanggá' na' yop heul' hawc'. ¹¹ Kopti, ku' yop heul' na' a lawn kue' ceng' ka munhpung' na' ko', ku' keutawn' cot'cu na' a ci na' pe kue' ceng' ka munhpung' na' lheu' awn' a a'neng?

¹² Kop awn' na, kopti kue' ya vang keutui' hpum' yeuhki' na', ya hpum' hat'han'. ¹³ Ya hkuin' seun' Mo'se eun. Mo'se eun ko', punta peue I'sarela' na' kaw ce un' pun ri nyu ku' ceng' ka munhpung' eun na' baet a ri yop heul' na', eun kang' buh ri na' ri hpen' na'. ¹⁴ Daecti hpum' ce na' cen' ka, kopti yam lip ce htawm Seungá' hk'im' na', hpen' kang' buh ti glawk' awn' a kawn' kue' rot seunyaen'. A hkuin' nang tuh' ri. Kopti hk'a'naee Hkrit Eun palkoe, hpen' awn' a cang ti ri tec ri pun. ¹⁵ Rot seunyaen', yam lip ce leukah' ritroe eun Mo'se na', hpen' awn' a kawn' cu ri kang' hpum' ce na'. ¹⁶ Daecti a'nhaw' lawn hpawt' ri ing' ri Cawo' Eun ko', hpen' awn' a kaw pun ri tuh' ri tec ri. ¹⁷ Cawo' na' meuh Eun Cit' seungá' na'. Cit' seungá' Eun Cawo' na' a lawn ut' tawngnhaw' ko', mawn' na' a pun hk'a' lawtpon na'. ¹⁸ E' ri gawm'euc', e' hkuin' laee pun ri kang' buh ri na'. E' buih til' ku' ceng' ka munhpung' Eun Cawo' na'. E' pun ri plin' ri baet ri seun' Cawo' Eun ri pun e' munhpung' Eun na' ti htan hawc' ti htan. Ceu nang aen' ce a lih neum Cawo' ku' meuh Cit' seungá' na' Eun.

4

¹ Kop awn' na, kopti pun ya kan' aen' a ri neum hk'a' tukyak Eun Peucawo' na', ya hkuin' hpum' lu. ² Ya tecla hk'a' hpum' vok' sa'pali ku' hk'o'kaic na' gawm'euc'. Ya hkuin' lo' hk'a' vok' hk'a' chi'lai na'. Ya hkuin' hpawt' ri keutah leukah' Eun Peucawo' na'. Daecti ya sangsawn' hk'a' neumneum na' nanggá' Eun Peucawo'. Aen' a meuh punta kaw peue yawng meuh ya peue hk'o'yum' pun.

³ Leukah' mun' ren'kawn ya na' a lawn pun ri kuip ri ko', a pun ri kuip ri pun peue kaw lulaic heul' na' ce.

⁴ Punta peue un' yum' na' kaw ce un' cang nyu ku' ceng' ka leukah' mun' ren'kawn munhpung' keuting Eun Hkrit Cawo' meuh ruprang Eun Peucawo' na', peucawo' ka cu maet'maen' na' a yeuh hpum' ce na' ngai' fec'. ⁵ Kopti hpaw ya ca' sangsawn' lawng ka tu' meun ya na', daecti ya sangsawn' lawng Eun Yesu' Hkrit meuh Eun Peucawo' na' mae' lawng meuh meun ya mhai' pe' kopti meuh a Yesu' Eun na'. ⁶ Kopti Peucawo' aen' lah' Eun, "Kah ku' ceng' na' pucti lih hk'ai' hk'a' duim'lawng na' reu"* , Eun kah ku' ceng' ri na' til' hk'a'naee hpum' ya na' punta kaw ya kue' ku' ceng' ka cu'yi cang yawng munhpung' Eun Peucawo' ku' pucti lih neum buh Eun Hkrit na'.

⁷ Daecti ya ri seun' ya keutong' keute'. Leukah' Eun Peucawo' na' a seun' hk'eung ngos heun' mo' ri hk'a'naee keutong' keute' na'. Ti'ca keuting na' lih a neum Peucawo' Eun, hpaw a ca' lih neum tu' ya na' meun. ⁸ Ya saec' na' pun ri hkam' hk'a' nuic peue ri ku hon' ku duih' na' ko', daecti a hkuin' nang rot ti bet'nyai' ya. Ya saec' na' kuit un' doh', daecti a hkuin' nang rot ti htan kuit teuk ya. ⁹ Ya saec' na' pun ri hkam' hk'a' keunhap' nokneh peue ri na' ko', daecti a hkuin' nang rot ti htan pun ri hkam' hk'a' tecla peue ya na'. Ya saec' na' pun ri hkam' hk'a' peum' peue ri cung'kus na' ko', daecti a hkuin' nang rot ti htan lulaic ya na'. ¹⁰ Punta a'yu Eun Yesu' na' kaw a pucti lih neum jawngkui' tu' ya na' yeut na', ya peus hk'a' yeum Eun na' laleung. ¹¹ Kopti peue a'yu im' ya ri na' pun ya ri ap ri ri hk'a' yeum Eun na' laleung. Aen' a meuh punta a'yu Eun na' kaw a pucti lih neum jawngkui' tu' cang yeum ya na'. ¹² Kop awn' na, hk'a' yeum na' a buih yeuh kan' hk'a'naee ya. Daecti hk'a' a'yu im' na' a buih yeuh kan' hk'a'naee pe'.

* 4:6 4:6 Yamla 1:3

¹³ Tem' a ri nang htawm Seungá na' yeuhki', "Kopti yum' ui', ui' leukah'."† Kopti kue' ya hk'a' yum' seun' aen' a na', ya leukah'. ¹⁴ Yawng ya Cawo' yeuh Cawo' Yesu' Eun tang kuh' im' na' kaw Eun yeuh ya tang kuh' im' maeé Cawo' Yesu' Eun. Eun kaw va ya ing' ri nanggal' Eun na' maeé pé' tiduih'. ¹⁵ Ceu nang aen' ce gawm'euc' a meuh ku' peuehot' pun pé'. Aen' a meuh punta peue yawng mun' Eun Peucawo' na' kaw peue gawm heun' na'. A kaw yeuh hk'a' mun' keuting ri Peucawo' Eun na' gawm heun'. A meuh ku' tuil' munhpung' ri Peucawo' Eun na'.

¹⁶ Kop awn' na, ya hkuin' hpum' lu. Hk'a' nham' keune hk'a' nok ya na' a saec' na' buih baet ti yawm' lih na' ko', daecti hk'a' civit hk'a' naee ya na' a buih baet ri huk'hawn' hk'u' ku seunyi. ¹⁷ Kopti hk'a' tukhka leng seuyung' pun ya ri hkam' ti vut ti yam aen' a na' kaw a yeuh ya pun ri rap munhpung' cot'cu ku' keuting nyawk'nyaec' hk'ai' ceu nang aen' ce na'. ¹⁸ Kopti hpaw ya ca' keue' ri ku' cang nyu ri na', daecti keue' ya ri ku' un' cang nyu ri na'. Kopti ku' cang nyu ya na' kue' a ti vut ti yam yawo, daecti ku' un' cang nyu ya na' a kue' cot'cu ri.

5

¹ Yawng e' tup' ka bhen' keute' ku' ut' e' hk'a' naee ka aen' a lawn pun ri lulaic heul' ko', kaw'n' kue' e' nya Peucawo' tuil' Eun. A meuh nya cot'cu hk'a' naee kuing' pang maó' na'. A hkuin' caee meuh ku' pleng' ri ri ti' peue. ² Yam buih ut' e' pang bhen' keute' na', kopti sum' cuip' hk'eung e' nya ka kuing' pang maó' na', e' nyel. ³ E' lawn pun ri cuip' a ko', e' hkuin' kaw laee ut' gung'gang'. ⁴ Yam kaw'n' buih ut' e' nang tup' aen' a na', e' peus beus seucen, e' nyel. A meuh kopti un' sum' ut' gung'gang' e' na', daecti sum' cuip' hk'eung e' nya ka kuing' pang maó' na'. Aen' a meuh

† 4:13 4:13 Suk'seun' 116:10

punta a'yu im' cot'cu na' kaw a gleun jawngkui' tu' kaw pun ri yeum e' na'. ⁵ Peucawo' meuh Eun Cawo' yeuh ceu nang aen' ce meuh gawm'euc'. Punta ceu nang aen' kaw a meuh neum na', Eun tuil' Cit' seunga' ri na' meuh sa'hki' ka hawc'.

⁶ Kop awn' na, saec' meuh yamnhaw' e' hpum' keutawn'. Yawng e' yam kawn' ut' e' hk'a'naee jawngkui' tu' ri aen' a na', ut' e' seungai Peucawo' Eun. ⁷ A'yu im' e' ri hk'a' yum' na'. Hpaw e' ca' a'yu im' ri ku' cang nyu na'. ⁸ E' hpum' keutawn'. E' jaen sum' ut' mae' Peucawo' Eun heun' hk'ai' ut' e' hk'a'naee jawngkui' tu' ri aen' na. ⁹ Kop awn' na, e' saec' na' ut' hk'a'naee jawngkui' tu' ri na', a'ko' gah' hk'ai' ka na', e' co'ca' ri kaw meuh peue hit' hpum' Eun Peucawo'. ¹⁰ Kopti e' ri gawm'euc', punta kaw e' pun ri rap ku' kuing'hpaw mae' ku' yeuh e' yam kawn' ut' e' hk'a'naee jawngkui' tu' ri aen' a na', ku' meuh ku' chak' yeuh e' na', a'ko' ku' un' chak' yeuh e' na', e' kaw kah ri ing' nanggal' ka tenceo' taws' a' mu Eun Hkrit na' ku' peue ri.

Kan' yeuh hk'a' htuk'lung Peucawo' Eun

¹¹ Kopti yawng ya ri lhat' til ri Peucawo' Eun na', ya sae'cae' sangsawn' peue. Ya ci' meuh peue yeuh sa'nhaw' na' Peucawo' yawng Eun a glih'gleueng'. Ui' ku' kuit rot ri hpum' cang yawng pe' na' na' yawng a yeut. ¹² Lah' ya a yeuh keutit' na' ko', ya hkuin' to' ri tang suk'seun' tu' ri na' meun nanggal' pe' bae. Daecti punta kaw pe' ti hk'a' mhawng' ya ri hk'o'cuin na' pe' na' cang heul' top' leukah' ce peue mhawng' ri hk'o'cuin mae' ku' cang nyu na' tang' ku' kue' hk'a'naee hpum' na' pun na'. ¹³ Ya lawn ma'rat ko', ma'rat ya pun Peucawo' Eun. Ya lawn chak' ngam ko', chak' ngam ya pun pe' ri. ¹⁴ Hk'a' leumeus'keus Eun Hkrit na' u'peung ka e'. Kopti yawng e' peue ti peue na' pun Eun ri hkam' ri yeum pun peue gawm'euc' na', kop awn' na,

peue gawm'euc' na' peue yeum hawc'. ¹⁵ Kopti pun Eun ri yeum pun peue gawm'euc' na', peue kaw'n' a'yu im' na' peue na' un' htuk' ri suip ri a'yu im' pun tu' ri na' meun, daecti peue na' htuk' ri a'yu im' pun Cawo' ku' pun ri sum a'yu ri hawc' ko' Eun tang kuh' im' pun peue na' Eun.

¹⁶ Kop awn' na, tang' neum maet'maen' na' heul', ya hkuin' kaw laee tawk lah' a'nhaw' hot' seun' hk'a' yeuh ce peue bhen' keute' na'. Nanggal' aen' na ya saec' na' tawn tawk lah' Hkrit Eun hot' seun' hk'a' yeuh ce peue bhen' keute' na' ko', daecti maet'maen' ya hkuin' kaw laee yeuh a bae. ¹⁷ Kop awn' na, a'nhaw' lawn ut' hk'a'naee Hkrit Eun ko', keut' eun ri meuh peue pun ri pleng' ri meuh peue hk'u' hawc'. Ku' hk'im' na' a rai' heul', a tang meuh ku' hk'u' gawm'euc' ri. ¹⁸ Ceu nang aen' ce gawm'euc' lih a neum Peucawo' Eun. Eun yeuh e' htuk'lung ri ri cu Eun Hkrit Eun. Eun tuil' kan' kaw yeuh peue htuk'lung ri na' ri ya. ¹⁹ Aen' a meuh Peucawo' yeuh Eun peue bhen' keute' na' peue tang htuk'lung ri ri cu Eun Hkrit Eun na'. Eun hkuin' mawt map' peue na'. Eun tuil' ya heul' sangsawn' lawng kaw peue htuk'lung ri na'. ²⁰ Kop awn' na, ya meuh nang tang' tu' Eun Hkrit. Peucawo' Eun klawng ri ti pe' ri cu Eun ya ri na'. Hk'a'naee muis Eun Hkrit na', ya hk'o' pe' na' tang htuk'lung Peucawo' Eun reu'. ²¹ Peucawo' yeuh Eun Hkrit ku' un' kue' map' na' Eun kue' map' na' kopti e' ri. Aen' a meuh punta hk'a'naee Hkrit Eun, kaw e' pun ri meuh peue leupaws seumeu' Eun Peucawo' na'.

6

¹ Hk'a'naee vang meuh e' peue yeuh kan' Eun Peucawo' na' ya hk'o'hk'ang a ri pe', pawlaee yeuh mun' Eun Peuca-wo' pun pe' ri rap ri ti na' meuh ku' hk'o'hk'awng'. ² Kopti Peucawo' lah' Eun,

“Hk'a'naee yam htuk' a hpum' Uí na', leuceng Uí leukah' mi na'.

Hk'a'naee seunyi ka hk'a' htut lawtpon na', Uí teum'kawm mi.”*

Ya lah' a ri pe', maet'maen' na' meuh a yam htuk' hpum' Eun Peucawo'. Seunyaen' na' meuh a seunyi ka hk'a' htut lawtpon na'.

Hk'a' tuxhka Paw'lu pun eun ri hkam'

³ Punta kaw peue un' cang chaw hkamram kan' ku' yeuh ya na', ya hkuin' yeuh ku' seuduih leuveul' a'nhaw' saec' ti peue. ⁴ Daecti punta kaw peue yawng meuh ya peue yeuh kan' Eun Peucawo' na', ya yeuh ku' hk'a' ku' ceu na' hk'a'naee hk'a' yeun' hkam, hk'a' tuxhka na' maeé' hk'a' nyhap' na'. ⁵ Ya ku' pun ri hkam' hk'a' ta'faet', pun ri lec htawng', pun ri hkam' hk'a' suksak yeuh ce peue kuing' na'. Ya yeuh kan' katcin, jal it' ri maeé' ngeup' ri. ⁶ Ya roksa' hk'a' seunga' chak', hk'a' cang yawng, hk'a' kuit lang' na' maeé' hk'a' cang tukyak ri na'. Cit' seunga' chak' na' a ut' maeé' ya. Hk'a' leumeus'keus ya na' a meuh hk'a' leumeus'keus neumneum. ⁷ Ya lah' ku' neumneum. Ti'ca Eun Peucawo' na' a yeuh kan' hk'a'naee ya. Ya jhawp' hk'eung an'nya ka hk'a' leupaws seumeu' na' hk'a' ti' a'tawm' maeé' hk'a' ti' a've' ri. ⁸ Ya saec' na' pun un' pun munhpung' ri, a'ko' ya saec' na' pun hk'a' suk'seun', a'ko' hk'a' chaw hkamram peue ri na' ko', ya kaw lah' ku' neumneum ka lawng ya na' laleung. Daecti ngon' peue lah' ya un' yeuh keutit'. ⁹ Ya saec' na' meuh peue peue yawng ya gawm'euc' ri ko', daecti peue yeuh ri seun' un' yawng ri ya ko'. Ya saec' na' seun' peue buih yeum na' ko', daecti ya kawn' a'yu im'. Ya saec' na' pun ri hkam' hk'a' ciyang peue ri na' ko', daecti a hkuin' nang hk'o' ya yeum. ¹⁰ Ya saec' na' pun ri hkam' hk'a' tuxhka na' ko', daecti ya

* 6:2 6:2 l'saya' 49:8

ren'kawn laleung. Ya saec' na' hk'o'tukyak na' ko', daecti ya yeuh peue meuneum heun' peue. Ya saec' meuh peue un' kue' keunhaw' na' ko', daecti ku ceu na' meuh a is' ya.

¹¹ Peue Kaw'rinhtu' ec'awng' na' pe', lah' seumeu' ya a ri pe', tuh' ya hpum' ri vahveung ri pe'. ¹² Hpaw ya ca' sawng' hpum' leumeus' ri na' ri pe', daecti sawng' pe' hpum' leumeus' ri na' ri ya. ¹³ Kaw ya lah' a ri pe' seun' lah' ya a ri kon' ri na' ce na'. Hk'o' pe' tuh' hpum' ri na' vahveung ri ya reu'.

Pawlaee peus aec' tiduih' maeé peue un' yum'

¹⁴ Pawlaee peus aec' tiduih' maeé peue un' yum' na' ce, kopti hk'a' leupaws seumeu' na' a ci' kaw cang pawng' ri maeé hk'a' un' leupaws seumeu' na' yeuh sa'nhaw'? Ku' ceng' na' a ci' kaw cang to' ri maeé ku' duim'lawng na' yeuh sa'nhaw'? ¹⁵ Hkrit Eun ci' kaw cang to' ri maeé Belial eun yeuh sa'nhaw'? Peue yum' maeé peue un' yum' na' ce ci' kue' ku' to' ri ri puri keunhaw'? ¹⁶ Nya hk'o' mun' Eun Peucawo' na' a ci' kaw cang hkawmaen ruphtu na' yeuh sa'nhaw'? Kopti meuh e' nya hk'o' mun' Eun Peucawo' Cawo' a'yu im' na' Eun. Seun' Peucawo' lah' Eun, "Kaw Ui' ut' maeé ce, Ui' kaw heul' maeé ce. Ui' kaw meuh Peucawo' ce, ce ku kaw meuh peue ceu Ui'."†

¹⁷ Peucawo' Eun ku lah' a hk'a'naee htawm Seunga' ton ku' seubu na',
"Pucti heul' hk'ai' ce,
hkvet' ri sawng' ut' reu'.

Pawlaee paic' ku' un' chak' un' seunga' na',
hawc' ko', Ui' kaw rap ri ti pe'."‡

¹⁸ "Kaw Ui' meuh Kuiing' pe',
pe' kaw meuh kon' beun' kon' me Ui'.

† 6:16 6:16 Faeé' 26:12; Yeramí' 32:38; Yesahkela' 37:27 ‡ 6:17 6:17 I'saya' 52:11; Yesahkela' 20:34, 41

Peucawo' ti'ca keuting na' Eun lah' a
yeuhki'."§

7

¹ A'mawo leumeus' na' pe', kopti pun e' leukah' kati yeuhki' na' hawc' na', kah e' saic' meun ri tec ku' yeuh jawngku' tu' mae' civit e' hk'aw'jeuk na' reu'. Yeuh hk'a' seungá' chak' na' htonnuk ri hk'a' lhat' til ri Peucawo' Eun na' reu'.

Paw'lu ren'kawn eun

² Hk'o' pe' tah' hpum' ri na' rap ri ti ya. Hpaw ya ca' yeuh ku' kleuc' ri a'nhaw'. Hpaw ya ca' yeuh a'nhaw' lulaic heul'. Hpaw ya ca' chi' lai ri hk'a' a'nhaw'. ³ Lah' ui' a yeuhki' na' a hkuin' to' ri meuh sum' tang' ui' map' ri pe'. Daecti tawn lah' ui' a ri pe' nanggal' aen' a yeut, ut' pe' hk'a' naee hpum' ya a hk'o' a rot ti htan kaw ya cu ri yeum yawo mae' pe' a ku na' pun na'. ⁴ Yum' ui' pe' meulamlam ri. Ui' mhawng' ri hk'o' cuin nyawk' kopti pe' ri. Ui' pun kaw' reng ri nyawk'. Hk'a' naee hk'a' tухka ya na' gawm' euc', ui' ku kawn' kue' hk'a' ren'kawn na' htonnuk.

⁵ Kopti yam rot ya nang kuing' Masido' ni' na', ya hkuin' pun ri keului' ri saec' peunae'. Hk'a' tухka na' kue' a rop ya. Hk'a' nok na' a kue' hk'a' kleuc' puri, hk'a' naee na' a kue' ku' hk'o' lhat'. ⁶ Daecti Peucawo' Cawo' cang yeuh peue hpum' lu ce tang kuit sam' ran na' Eun yeuh ya kuit sam' ran ri cus' Eun Ti'tas' eun heul' ri ya. ⁷ Ya hkuin' kuit sam' ran ri Ti'tas' heul' rot eun na' palkoe, daecti a ku meuh kopti hk'a' kuit sam' ran tuil' pe' ri Ti'tas' eun na' yeut. Eun lah' a ri ya, lah' pe' lah' ri sum' nyu ya, pe' hki' keung ri ya pe' heul' kuit nyhap'. Aen' ce a yeuh ui' gawm ren'kawn nyawk'.

§ 6:18 6:18 2 Samoela' 7:8, 14

⁸ Htawm tem' ui' ri tuil' ri pe' na' a saec' na' yeuh pe' hpum' lu na' ko', daecti ui' hkuin' hpum' lu. Nanggal' aen' na, ui' saec' na' tawn hpum' lu, maet' maen' ui' hkuin' laee hpum' lu. Pun ui' ri yawng htawm aen' yeuh a pe' hpum' lu yawo ti vut ti yam. ⁹ Maet' maen' na' ren' kawn ui'. A hkuin' meuh kopti yeuh ui' pe' hpum' lu na', daecti meuh a kopti hk'a' hpum' lu awn' yeuh a pe' tang taws' hpum' fuin map' ri na', kopti hpum' lu pe' hot' alo Eun Peucawo' na'. Kop awn' na, ya hkuin' pun ri yeuh ku' sui' ri pe'. ¹⁰ Kopti hk'a' hpum' lu hot' alo Eun Peucawo' na' yeuh a peue tang taws' hpum' fuin map' ri na', a va peue ing' ri hk'a' htut lawtpon na'. A hkuin' meuh ku' hpum' lu. Daecti hk'a' hpum' lu ka bhen' keute' na' a va peue heul' ri hk'a' yeum na'. ¹¹ Hk'a' hpum' lu hot' alo Eun Peucawo' na' a ci' yeuh keunhaw' na' pucti lih hk'a' naee pe' na' kuit ri nawk a reu', a meuh kue' pe' hpum' co'ca', lah' meun tu' ri leupaws seumeu', hk'a' seungeueng' ri peue yeuh map' na' ce, hk'a' pawn kui' ri, hk'a' keutui' hpum', hk'a' peus hpum' ri mae' hk'a' tang yeuh ri top' na'. Un' laee yeuh kleuc' pe' ri ceu nang aen' ce na^{*}, pe' htawhkam meun a ri ti hawc'. ¹² Kop awn' na, tem' ui' htawm ri pe' na' a hkuin' meuh pun peue yeuh ku' kleuc', a'ko' pun peue pun ri hkam' ku' kleuc' na' ce. Daecti a meuh punta pe' ci' pe ti a'ye' ya a'neng na', kaw pe' pun ri yawng a nanggal' Eun Peucawo' na'. ¹³ Kopti meuh a ceu nang aen' ce na', ya pun kaw'reng ri.

Lheu' si' pun ya kaw'reng ri na', ya ku jaen ren'kawn nyawk' kopti pun ya ri nyu Ti'tas' eun ci' pe ren'kawn a'neng kopti bae pe' kaw'reng ka civit eun na'. ¹⁴ Ui' lah' eun mhawng' lawng mhawng' ui' ri hk'o'cuin mae' pe' na', hpaw pe' ca' yeuh ui' kaic. Seun' ku' lah' ya ri pe' ku ceu na' meuh a ku' meuh neum na', ku' mhawng' ya ri hk'o'cuin mae' pe' ri Ti'tas' eun na' a ku meuh ku'

* 7:11 7:11 1 Kaw'rinhtu' 5:1

neumneum yeut, a pucti lih glih'gleueng' hawc'. ¹⁵ Yam Títas' kuit rot eun ri lawng hk'a' cang leuceng pé' ri ti ná' maeé' lawng hk'a' rap pé' ri ti eun maeé' lhat' keuyuing' ri ná', eun jaen gawm leumeus' pé' heun' nyawk'. ¹⁶ Kopti cang yum' pun pé' hk'a'naeé' ku ceu ná', uí' ren'kawn.

8

Tiptan maeé' hpum' vahveung ri

¹ Ec'awng' ná' pé', Peucawó' Eun cí' nap mun' ri muk kon' Hkrit nang kuing' Masido'ni' ná' ce yeuh sa'nhaw' ná', ya sum' kah pé' yawng a. ² Yam pun ce ri hkam' hk'a' cop'long ku' kuit nyhap' reng nyawk' ná', hk'a' ren'kawn htonnuk ce ná' maeé' hk'a' hk'o'tukyak nyawk' ce ná' nuk veh bah ka a keut' ri meuh hk'a' tiptan heun'heun' ná'. ³ Kopti uí' ku pen' hkam' sa'hki' ka tiptan ce hot' seun' ku' yeuh pun ce ná'. Neumneum ka ná' kó', kawn' tang tiptan ce lheu' ku' yeuh pun ce ná' maeé' kue' ce cetana ná'. ⁴ Ce sae'caee' hk'o' a ri ya hk'o' ri pawng' ri maeé' kan' teum'kawm muk kon' Hkrit ná' ce. ⁵ Ce kawn' yeuh a lheu' ku' keutuí' hpum' ya ná'. Ce sawng' tan tu' ri ná' meun ri Peucawó' Eun nanggal'. Hawc' kó', ce tan tu' ri ná' ri ya hot' seun' alo Eun Peucawó' ná'. ⁶ Kop awn' na, ya tuil' kaw' reng eun Títas' ku' meuh nang tang' ri yeuh kan' teum'kawm aen' a maeé' pé' ná' eun kah eun heul' suip ri teum'kawm pé' yeuh a hawc'. ⁷ Seun' ara pé' ri ku hk'a' ku ceu ná', hk'a' yum', a'ko' hk'a' leukah' leupong, a'ko' hk'a' cú'yi, a'ko' hk'a' có'ca', a'ko' hk'a' leumeus' pé' ya ná', yeuh ri ara ri kan' teum'kawm aen' a yeut reu'.

⁸ Lah' uí' a yeuhki' ná' hpaw uí' ca' to' ri tuil' leukah' tec'teng pé', daecti sum' caet uí' ri nawk hk'a' leumeus'keus sut' hpum' pé' ná' ri keutec uí' pé' maeé' hk'a' có'ca' ce peue seubu ná'. ⁹ Kopti yawng pé' mun' Eun Cawó' Yesu' Hkrit é' ná' hawc'. Eun saec' ná' meuneum kó',

Eun yawm' ri hk'o'tukyak pun pe'. Aen' a meuh punta kaw pe' pun ri meuneum kopti hk'a' hk'o'tukyak Eun na'.

¹⁰ Kaw uí' tuil' kamkuit chak' to' ri ri lawng aen' a na' ri pe'. Neum lawn na', meuh pe' muk tang' ri yeuh kan' tiptan na' nanggal' peue a hkuin' meuh awn' a koe, daecti pe' ku meuh muk kue' hpum' sum' tiptan na' nanggal' peue yeut. ¹¹ Maet' maen' na', heul' yeuh a hawc' euc' hot' seun' hpum' huk' sum' tiptan pe' na' hot' htan yeuh pun pe' a na' reu'. ¹² Kopti pe' lawn kue' hpum' sum' tiptan na' ko', Peucawo' kaw Eun nyu a hit' hpum' ri rap ri ti a hot' seun' ku' kue' pe' na', a hkuin' kaw meuh hot' seun' ku' un' kue' pe' na'.

¹³ Hpaw a ca' to' ri meuh yeuh uí' beus peue na' seuyung', uí' tawl' yeuh beus pe' na' seucen. Daecti sum' kah uí' a keuteul puri. ¹⁴ Yam kue' pe' htonnuk na', htuk' pe' ri teum'kawm peue cuthkuin' na' ce. Aen' a meuh punta yam na' ce kue' htonnuk ce na' tang cang teum'kawm hk'a' cuthkuin' pe' na'. A na' keuteul puri, ¹⁵ hot' seun' ku' tem' ri nang htawm Seunga' na', "Peue seut' ri ti heun' na' a hkuin' laee kue' nang lheu' ka. Peue seut' ri ti leng na' ce hkuin' laee kue' ku' cuthkuin'."*

Cus' Ti'tas' eun heul' nang veng Kaw'rinhtu'

¹⁶ Mun' keuting uí' ri Peucawo' Cawo' tuil' Ti'tas' eun kue' hpum' kuit nyhap' pun pe' seun' uí' ri kue' uí' yeut na'. ¹⁷ Kopti meuh a leuceng eun leukah' hk'o'hk'ang ya na' palkoe a hkuin' meuh, daecti lak' kuit meun eun ri sum' heul' ri pe' nyawk'. ¹⁸ Ya ku cus' ec'awng' ti peue na' eun heul' maeé' Ti'tas' eun yeut. Eun meuh peue muis laws' hk'a'naee kan' sangsawn' leukah' mun' ren'kawn na' hk'a'naee muk kon' Hkrit na' ce. ¹⁹ Lheu' awn' na, muk kon' Hkrit na' ce leuk ec'awng' awn' eun heul' maeé' ya yam pin'

* 8:15 8:15 Pucti heul' 16:18

ya paec tan heul' nang veng Yeru'salaem na'. Yeuh ya kan' pin' ri heul' tuil' paec tan aen' a ko', a meuh punta kaw ya tuil' munhpung' Eun Peucawo' na' mae' punta kaw a yeuh hpum' sum' teum'kawm ya na' pucti lih glih'gleueng' na'.²⁰ Ya hkuin' sum' kah a'nhaw' chaw hkamram ri hk'a'nae vang gvah ya ri tuil' paec tan heun' aen' a na'.²¹ Kopti ya hkuin' sum' yeuh ku' cawp' na' nanggal' Eun Peucawo' na' palkoe, daecti ya ku sum' yeuh ku' cawp' na' nanggal' ce peue na' yeut.

²² Ya ku cus' ec'awng' seubu ti peue na' eun heul' mae' ka yeut. Ec'awng' ku' ti peue awn' meuh eun peue ren' seuyung'seuyah' hk'a'nae hk'a' heun' ceu na', ya ku caet ti nawk eun heun' pok hawc'. Maet'maen', kopti tah' eun hpum' ri ri pe' na', eun jaen gawm ren' seuyung'seuyah' nyawk'.²³ Pun Ti'tas' eun rit', meuh eun pu yeuh kan' mae' ui' pun pe'. Pun ec'awng' aen' ka ko', ka meuh peue cus' ce muk kon' Hkrit na'. Ka meuh munhpung' Eun Hkrit.²⁴ Kop awn' na, tuh' ka nyu hk'a' leumeus'keus pe' na' mae' hk'a' mhawng' ya ri hk'o'cuin mae' pe' na' reu'. Yeuh keutit' na', muk kon' Hkrit na' ce ku kaw pun ri nyu a yeut.

9

¹ Lawng hk'a' teum'kawm peue Eun Peucawo' na' ce ko', hpaw ui' ca' kaw lae lo' ri tem' lai ri pe'.² Kopti yawng ui' kue' pe' hpum' sum' teum'kawm peue na'. Ui' ku lah' ri mhawng' ri hk'o'cuin mae' ka ri peue Masido'ni' maen' na' ce. Ui' lah' ce mhawng' peue Ahkaiya' na' rangraen pe' ri kaw teum'kawm peue tang' neum lawn na' hawc'. Hk'a' hpum' huk' pe' aen' a ku yeuh ce hpum' huk' hk'a' heun' yeut.³ Daecti cus' ui' ec'awng' aen' ce heul' ri pe' na' a meuh punta hk'a' mhawng' ui' ri hk'o'cuin mae' pe' na' kaw a un' meuh ku' hk'o'hk'awng' na'. Daecti a kaw

meuh punta kaw pé' rangraen ri meulamlam ri hot' seun' ku' lah' uí' ri pé' hawc' ná'. ⁴ Kopti peue Masido' ní' ná' ce lawn cang caw ri hot' uí' ing', ce ná' nyu un' rangraen pé' ri hot' seun' ku' mhawng' uí' ri hk'o'cuin maeé' pé' ná' kó', pé' hkuin' kaw pun ri kaic koe, saec' meuh ya ri, ya ku kaw pun ri kaic yeut. ⁵ Kop awn' na, kuit uí' kaw uí' kah ri cus' ec'awng' awn' ce bai heul' ri pé' nanggal' uí'. Aen' a meuh punta kaw pé' bai rangraen ri uin' paec tan ná' hot' seun' yeuh pé' kati ri hawc' ná'. A kaw meuh paec tan tan ri maeé' hpum' vahveung ri, a hkuin' kaw meuh tan maeé' meuh a hk'a' tec'teng.

⁶ Yeuh ri pawn a, peue puin' leng ná' pun ce ri vuic leng. Peue puin' heun' ná' ce pun ri vuic heun'. ⁷ Pé' ri ku peue, htuk' pé' ri tan hot' seun' ku' kuit pé' deut hk'a'naee hpum' ri ná'. Pawlaee yeuh a maeé' hkoe'mang' ri a, a'kó' maeé' meuh a hk'a' tec'teng ná'. Kopti Peucawó' leumeus' Eun peue ren'kawn tiptan ná' peue. ⁸ Peucawó' Eun cang tuil' mun' htonnuk ku ceu ná' ri pé'. Aen' a meuh punta kaw pé' kue' ku' lo' ku ceu ná' htonnuk laleung ná', maeé' a ku kaw kue' ku' lo' ri hk'a'naee vang yeuh pé' kan' chak' ku ceu ná' htonnuk. ⁹ Aen' a meuh hot' seun' ku' tem' ri hk'a'naee htawm Seunga' ná',
“Gvah eun ri tuil' ri peue hk'o'tukyak ná' ce.

Hk'a' leupaws seumeu' eun ná' a keutawn' cot'cu.”*

¹⁰ Maet'maen', Peucawó' Cawó' tuil' ku' seumal ná' ri nang puin' ku' seumal, Cawó' tuil' ku' hk'a' ná' ri peue ná' Eun ku kaw yeuh ku' puin' pé' ná' baet ri gawm heun', Eun ku kaw yeuh plí' ka hk'a' leupaws seumeu' pé' ná' baet ri gawm huk'hawn'. ¹¹ Punta kaw pé' cang teum'kawm peue laleung ná', Eun kaw yeuh pé' meuneum ri ku hk'a' ku ceu ná'. Kopti meuh a hk'a' teum'kawm pé' peue ri cu pé' ya ná', peue kaw mun' keuting ri Peucawó' Eun.

* 9:9 9:9 Suk'seun' 112:9

¹² Kopti kan' teum'kawm peue ku' buih yeuh pé' aen' a ko', hpaw a ca' teum'kawm peue Eun Peucawo' ku' cuthkuin' na' ce palkoe, daecti a ku yeuh hk'a' mun' keuting ri Peucawo' Eun na' pucti lih heun'heun' yeut. ¹³ Pé' cí' meuh peue yeuh sa'nhaw' na' kaw peue yawng a hk'a'naee kan' teum'kawm pé' peue aen' na. Kopti meuh a kan' teum'kawm aen' na maeé' kopti yum' pé', pé' leuceng ri ti hot' ri yeuh leukah' mun' ren'kawm Eun Hkrit na' maeé' kopti teum'kawm pé' ce baeé' peue seubu gawm'euc' na' peue maeé' hpum' vahveung ri na', peue kaw suk'seun' Peucawo' Eun. ¹⁴ Kopti Peucawo' nap Eun mun' heun' keuting ri pé' na', ce kaw keutuí' hpum' pé' nyawk', hk'o' mun' pun pé'. ¹⁵ Kopti Peucawo' tuil' Eun lapsawng' un' laee pe lah' na', mun' keuting ri Heun reu'.

10

Paw'lu lah' eun leukah' to'tam' ku' kaw ing' yeuh kan' eun lu na'

¹ Uí' ri, meuh uí' Paw'lu. Uí' hk'o'hk'ang a ri pé' hk'a'naee hpum' onawn' Eun Hkrit na'. Yam ut' uí' maeé' pé' na', lah' pé' uí' hpum' onawn'. Daecti yam ut' uí' seungai pé' na', pé' lah' uí' hpum' hat'han'. ² Yam ing' rot uí' ri pé' na', uí' hk'o' a ri pé', pawlaee kah uí' yeuh hpum' hat'han' ri na' hot' seun' ku' kuit uí' ri kaw yeuh a ri peue ngon' ku' hteum' pé' ya a'yu im' hot' hk'a' a'yu im' ka bhen' keute' na' pé' na'. ³ Kopti ya saec' ut' pang bhen' keute' na' ko', daecti ya hkuin' peue'ng suik' hot' seun' hk'a' peue'ng suik' ka bhen' keute' na'. ⁴ Hk'eung an'nya ya na' a hkuin' meuh hk'eung an'nya ka bhen' keute' na', daecti a meuh hk'eung an'nya kue' tí'ca Eun Peucawo'. A cang yeuh tawp na' ce lhu'jah heul'. ⁵ Ya yeuh ku' htu'hting' na' maeé' ku' ham'tap hk'a' kaw cang yawng cu'yi Eun Peucawo' na' ce lhu'jah heul'. Ya tec'teng kamkuit ku kamkuit na' yawm' ri

leuceng ri ti leukah' Eun Hkrit na'. ⁶ Yam hawc' pe' leuceng ri ti a htonnuk na' ko', ya rangraen ri kaw ciyang peue un' leuceng ri ti na' ce hawc'.

⁷ Keue' pe' ri hk'a' nok ka na' palkoe. A'nhaw' lawn na' sawn' meun ri meuh peue Eun Hkrit ko', eun ku na' htuk' ri caet ri nawk meuh ya peue Eun Hkrit seun' heun ri yeut na'. ⁸ Kopti ti'ca ku' Peucawo' tuil' Eun ri ui' punta kaw ui' yeuh pe' huk'hawn' na' a hkuin' meuh punta kaw ui' yeuh pe' lulaic na', ui' saec' na' ca ri mhawng' ri hk'o'cuin mae' ka hk'a' heun' ko', ui' hkuin' kaic ri ka. ⁹ Tem' ui' htawm yeuhki' na', hpaw a ca' meuh kopti sum' yeuh ui' pe' lhat' na'. ¹⁰ Kopti peue ngon' na' lah' ce, "Htawm eun Paw'lu na' a saec' na' seucen reng, mae' a ti'ca keuting nyawk' na' ko', daecti yam ut' eun mae' e' na', kaw' reng kloe eun. Leukah' eun na' a hkuin' chae' cang lo' ri." ¹¹ Kah peue awn' ce yawng a yeuhki' reu', htawm ui' na' a lawn lah' a yeuh sa'nhaw' yam un' ut' ui' na' ko', yam ing' ui' na' ui' ku kaw yeuh seun' awn' a yeut.

¹² Hpaw ya ca' hat' ri keutec tu' ri na' mae' peue ngon' ku' suk' seun' meun tu' ri na' ce. Yam sawng' keutec meun ce tu' ri na' mae' puri na', ce meuh peue un' kue' cu'yi. ¹³ Hpaw ya ca' kaw mhawng' ri hk'o'cuin pon lheu', daecti kaw ya mhawng' ri hk'o'cuin yawo pal mae' ku' Peucawo' hkvet' Eun ri uin' pun ya na'. Saec' pe' ri, pe' ku pawng' ri mae' vang hkvet' ri awn' a yeut. ¹⁴ Hpaw ya ca' mhawng' ri hk'o'cuin pon lheu', meuh a kopti ti ya leukah' mun' ren'kawn Eun Hkrit na' ing' ri pe' na'. Daecti ya lawn un' ing' ri pe' ko', na' ya mhawng' ri hk'o'cuin pon lheu' yeut. ¹⁵ Hpaw ya ca' mhawng' ri hk'o'cuin pon lheu'. Hpaw ya ca' mhawng' ri hk'o'cuin mae' kan' ku' yeuh ce peue seubu na'. Daecti keutui' hpum' ya yam hk'a' yum' pe' na' a keuting huk'hawn' na', kan' ya na' a ku na' jaen gawm vahveung heul' hk'a'naee pe' ri yeut. ¹⁶ Aen' a meuh punta

kaw ya pun ri sangsawn' leukah' mun' ren'kawn na' pon vang ut' pe' na' heul'. Ya hkuin' sum' mhawng' ri hk'o'cuin mae' kan' ku' yeuh nang kuing' peue seubu na'. ¹⁷ Daecti "A'nhaw' lawn sum' mhawng' ri hk'o'cuin ko', mhawng' ri hk'o'cuin mae' Peucawo' Eun reu'."* ¹⁸ Kopti peue suk'seun' tu' ri meun na' eun ko', hpaw eun ca' meuh peue kue' munhpung', daecti peue kue' munhpung' na' meuh eun peue ku' Peucawo' suk'seun' Eun na' eun.

11

Paw'lu mae' peue caee caec' Eun Yesu' na' ce

¹ Uí sum' hk'o' pe' yeun'hkam ri leuceng hk'a' nga' suisa uí na'. Daecti neumneum ka na' ko', pe' ku buih leuceng a hawc'. ² Uí hki'keung ri pe' seun' Peucawo' hki'keung Eun ri pe' na' yeut. Kopti punta kaw uí tan pe' ri Hkrit Eun seun' meuh pe' kon'hk'ih' plot'lon seunga' chak' na', uí yeuh kati ri hawc' kaw kah pe' ti yawo ri is' me ti peue na' Eun. ³ Daecti seun' seueueng' na' cop'long ka E'va eun ri hk'a' chi'lai ri na', uí hki'keung ri saec' meuh hpum' pe' na' a na' cang pun ri cop'long ri kleuc' heul' hk'ai' hk'a' kati keutawn' na' mae' hk'ai' hk'a' seunga' chak' kue' pe' hk'a'naee Hkrit Eun na'. ⁴ Kopti a'nhaw' lawn ing' sangsawn' pe' ri lawng eun Yesu' seubu a chat ku' sangsawn' ya ri pe' na', a'ko' pe' lawn rap ri ti cit' seunga' seubu a chat ku' pun pe' ri rap ri ti a hawc' na', a'ko' rap pe' ri ti leukah' mun' ren'kawn seubu a chat ku' pun pe' ri rap ri ti a hawc' na' ko', pe' yeun'hkam rap ri ti sam'ran a. ⁵ Daecti kuit uí ri un' chaw hk'ai' "peue caee ara" awn' ce. ⁶ Uí saec' na' un' ara ri leukah' ko', daecti kue' uí cu'yi. Ya yeuh pe' nawk a glih'gleueng' ku hk'a' ka hawc'.

* 10:17 10:17 Yerami' 9:24

⁷ Tang' uí' tú' ri ná' tem, uí' yuk pé' ri lhung' ri sangsawn' uí' pé' ri leukah' mun' ren'kawn Eun Peucawó' ná' uí' un' laee sawn' ngos ka ná', uí' kleuc' aw? ⁸ Punta kaw uí' yeuh mhai' pé' ná', uí' con' muk kon' Hkrit seubu ná' ce ri rap uí' ri ti leumuil tan ce ná'. ⁹ Yam ut' uí' maeé' pé' uí' lo' ku' ti ri ceu ná', uí' hkuin' yeuh a meuh beus ri a'nhaw' saec' ti peue. Kopti ec'awng' ing' neum kuing' Masido'ni' ná' teum'kawm ce ku' lo' uí' ná' ce. Kop awn' na punta kaw uí' un' meuh beus ri pé' ná', uí' uin' sati ri. Uí' ku kaw yeuh a ko' heul' hk'a' nanggal' ka yeut. ¹⁰ Seun' hk'a' neumneum Eun Hkrit ná' kue' a hk'a'naee uí' ná', a'nhaw' hkuin' kaw cang ham'tap uí' un' kah uí' lah' leukah' mhawng' uí' ri hk'o'cuin ri lawng aen' a hk'a'naee kuing' Ahkaiya' ná' saec' ti peue. ¹¹ A ci' meuh kop keunhaw'? Meuh a kopti un' leumeus' uí' pé' ná' aw? Peucawó' yawng Eun leumeus' uí' pé' yeut. ¹² Punta peue ngon' ná' kaw ce un' laee pun ri lah' ri mhawng' ri hk'o'cuin maeé' ku' yeuh ce ná' seun' a is' ya ná', uí' kaw tang suip ri yeuh ku' buih yeuh uí' maet' maen' ná' heul' yeut.

¹³ Kopti peue awn' meuh ce peue caee caec' Eun Yesu'. Ce meuh nang yeuh kan' cang chí' lai. Ce meuh peue guil ri meuh peue caee Eun Yesu'. ¹⁴ Ku' yeuhki' ná', a hkuin' meuh ku' hk'o'am'. Saec' meuh Satan ná', a cang guil ri yeuh ri meuh in'hpom ka ku' ceng' ná' yeut. ¹⁵ Kop awn' na, peue caee ka Satan ná' ce lawn guil ri yeuh ri meuh peue caee ka hk'a' leupaws seumeu' ná' ko', a hkuin' meuh ku' hk'o'am'. Vang tisu't' ce ná' kaw a kuing' hpaw maeé' ku' yeuh ce ná' yeut.

Paw'lu mhawng' eun ri hk'o'cuin maeé' ku' tukhka ri ná'

¹⁶ Kaw uí' tang lah' a bae ti pok, pawlaee hteum' uí' meuh peue suisa. Daecti pé' lawn hteum' a yeuhki' ko', punta kaw uí' cang mhawng' ri hk'o'cuin peunaeng' ná',

hk'o' pé rap ri ti uí seun' rap pé ri ti peue nga' suisa ná' kó'. ¹⁷ (Yeuh uí hpum' ri hat'han' uí mhawng' ri hk'o'cuin lah' a yeuhki' ná', hpaw uí' ca' lah' a hot' hk'a' Eun Peucawo' ná', daecti lah' uí' a seun' meuh uí' peue nga' suisa ná' kó'.) ¹⁸ Seun' peue heun' ná' mhawng' ce ri hk'o'cuin hot' hk'a' nham' keune ná' kó', uí' ku kaw' hk'o' ri mhawng' ri hk'o'cuin peunaeng' yeut. ¹⁹ Kopti ren'kawn pé' yeun'hkam ri leuceng ri ti leukah' ce peue nga' suisa aen' ce ná', hteum' pé' ri heng'laet' nyawk' aw? ²⁰ Neumneum ka ná' kó', peue ku' ce yeuh pé' meuh mhai' ri ná', peue yeuh ri hk'a' ri pé' ná', peue chi'lai ri hk'a' pé' ná', peue tang' tu' ri lhung' keuting ná' maeé' peue dah beh pé' ná' pé' yeun'hkam ri ce. ²¹ Yam uí' ri un' yeuh uí' ku' sui' ri pé' seun' ku' yeuh ce ri pé' ná', hteum' pé' uí' yeuh ku' hk'o'kaic aw?

A'nhaw' lawn hat' ri mhawng' ri hk'o'cuin maeé' lawng ku' ti ri ceu ná' kó', uí' lah' a seun' meuh uí' peue nga' suisa ná' kó', uí' ku hat' ri mhawng' ri hk'o'cuin ri lawng awn' a yeut. ²² Meuh ce peue Hebrae' aw? Uí' ku meuh yeut. Meuh ce peue Ísarela' aw? Uí' ku meuh yeut. Meuh ce ceucat eun Abraham aw? Uí' ku meuh yeut. ²³ Meuh ce mhai' Eun Hkrit aw? (Lah' uí' a yeuhki' ná' a seun' meuh uí' peue ma'rat kó'.) Uí' ku jaen meuh lheu' ce ri yeut. Uí' yeuh kan' heun' hk'ai' ce ri. Uí' tawn pun ri lec htawng' heun' hk'ai' ce ri. Uí' pun ri hkam' hk'a' ta'faet' reng nyawk' ná' lheu' ce ri. Uí' pun ri keucu hk'eup' hk'a' daee yeum ná' heun' hk'ai' ce ri. ²⁴ Uí' tawn pun ri hkam' peue Yu'da ná' ta'faet' ce ri leuoekul' seudim' tí' ná' hpawn' pok. ²⁵ Uí' pun ri hkam' hk'a' peum' peue ri a'ngéul' chí' ná' loé' pok, dhim' peue ri seumu ná' ti pok, reu cum' ná' loé' pok, pun ri pu pang hak' ka mha'seumut' ná' ti sum' pai' ti seunyi. ²⁶ Uí' kah ri long hk'a' heul' ti duih' hawc' ti duih' laleung. Uí' pun ri hk'eup' ku'

hk'o'lhat' nang leuum', hk'eup' ku' hk'o'lhat' ri peue con', hk'eup' ku' hk'o'lhat' ri peue kuing' ui' na' ce, hk'eup' ku' hk'o'lhat' ri peue un' meuh peue ceu Yu'da na' ce, hk'eup' ku' hk'o'lhat' hk'a'naee veng, hk'eup' ku' hk'o'lhat' nang hk'i, hk'eup' ku' hk'o'lhat' nang mha'seumut' na' mae' hk'eup' ku' hk'o'lhat' ri peue guil ri meuh ec'awng' ui' na' ce. ²⁷ Uí kah ri yeuh kan' nyhap' kan' tal, un' pun ri it' ri sak' laleung, pun ri ngeup' ri, keucu un' pun ri hk'a un' pun ri nyui mae' pun ri hkam' kawt' ut' gung'gang'. ²⁸ Lheu' awn' na, hk'a' kuit nyhap' kuit yak ui' pun muk kon' Hkrit na' ce a geut' teng' ui' ku seunyi. ²⁹ A'nhaw' lawn kaw'l'reng kloe ko', un' kaw'l'reng kloe ui' aw? A'nhaw' lawn pun ri hkam' hk'a' kleuc' hk'a' ri yeuh map' na' ko', un' kleh' ui' aw?

³⁰ Uí lawn kaw kah ri mhawng' ri hk'o'cuin ko', kaw ui' mhawng' ri hk'o'cuin ri lawng hk'a' kaw'l'reng kloe ri na'. ³¹ Peucawo' Cawo' kuing' ri suk'seun' cot'cu Eun meuh a'kuiing' Eun Cawo' Yesu' e' na' yawng Eun un' chi'lai ui'. ³² Punta kaw peue mheut' ri ti ui' hk'a'naee veng Damas'kas' na', cawo' ka veng eun hkun'haw' hkam' Aretas' na' eun kah peue suik' ri na' ce kawn veng Damas'kas' na' rop hk'awp'. ³³ Daecti kopti seue' peue ui' nang a' hk'uipeue ruic' ui' hk'ai' hpa'pong' ka hkui veng na', ui' pun ri pon hk'ai' dak ti' eun cawo' veng na'.

12

Limit mae' hkawm' hk'a' nham' keune eun Paw'lu

¹ Ca' ui' lak' kaw kah ri suip ri mhawng' ri hk'o'cuin. A saec' na' un' kue' peuehot' ko', ui' ca' lak' kaw ris lawng limit mae' ku' Cawo' Peucawo' tuh' Eun ui' nyu na' ce. ² Yam pon heul' hawc' kul'pun' neum na', yawng ui' peue ut' hk'a'naee Hkrit Eun ti peue na' pun eun ri yuk ri huk' nang kuing' pang maó na' rot loe' htan ti htan ka na'. (Uí

hkuin' yawng huk' eun gawm' tu' ri na', a'ko' huk' eun cit' ri na' palkoe. Peucawo' Eun yawng a.) ³Ui' yawng hkawn' pun eun ri yuk ri huk' hk'a'naee kuing' Paradi'su' na'. (Ui' hkuin' yawng huk' eun gawm' tu' ri na', a'ko' huk' eun cit' ri na' palkoe. Peucawo' Eun yawng a.) ⁴Eun pun ri mhawng' leukah' un' cang ris pun un' cang kah peue ris a na'. ⁵Ui' ca' lak' kaw mhawng' ri hk'o'cuin mae' hkawn' eun. A lawn un' meuh yawo lawng hk'a' kaw' reng kloe ui' na' ce ko', ui' hkuin' kaw mhawng' ri hk'o'cuin mae' tu' ri na'. ⁶Ui' lawn sum' mhawng' ri hk'o'cuin ko', ui' hkuin' kaw va ri meuh peue suisa, kopti kaw ui' lah' ku' neumneum na'. Daecti punta kaw peue un' cang suk'seun' ui' pon lheu' hk'ai' ku' lah' ku' yeuh ui' na', ui' ca' lak' kaw mhawng' ri hk'o'cuin mae' tu' ri na'.

⁷Kopti meuh a ku' chak' nyawk' pun ui' ri nyu na' punta kaw ui' un' yuk tu' ri na' keuting pon lheu' na', Peucawo' Eun yeuh hk'a'naee keune ui' na' kue' hkawm'. Hkawm' awn' a meuh peue caee ka Satan na'. Punta kaw ui' un' yuk tu' ri na' keuting pon lheu' na', a ko' ri keunhap' nokneh ui'. ⁸Punta hkawm' aen' kaw a pucti lih hk'ai' ui' na', ui' hk'o' hk'ang a ri Peucawo' Eun hton loe' pok hawc'. ⁹Daecti Eun lah' a ri ui', "Punta ti'ca Ui' na' kaw a pucti lih htonnuk hk'a'naee hk'a' kaw' reng kloe mi na', mun' Ui' na' kue' a htonnuk pun mi." Kop awn' na, punta ti'ca Eun Hkrit na' kaw a kah ri kue' hk'a'naee ui' na', ui' mhawng' ri hk'o'cuin mae' hk'a' kaw' reng kloe ri na' hk'a'naee hk'a' ren'kawn na'. ¹⁰Kop awn' na kopti meuh a Hkrit Eun na', ui' ren'kawn hk'a'naee hk'a' kaw' reng kloe, hk'a'naee hk'a' chaw hkamram peue ri, hk'a'naee hk'a' tukhka, hk'a'naee hk'a' keunhap' nokneh peue ri na' mae' hk'a'naee hk'a' hk'o'tukyak na'. Kopti yam kaw' reng kloe ui' na', ui' kaw' reng keuting.

Paw'lu kuit nyhap' eun pun ec'awng' veng Kaw'rinhtu'

¹¹ Yeuh meun uí ri meuh peue nga' suisa hawc', daecti meuh pé nang cú'cí uí meuh yeuhki'. Htuk' pé ri suk'seun' uí. Kopti uí saec' na' un' ara, daecti hpaw uí ca' chaw hk'ai' "peue caee ara" awn' ce saec' peunae'. ¹² Ku' peue caee Eun Yesu' htuk' ce ri kue' na' uí co'ca' ri yeuh pé nawk a hawc' ri yeuh uí het' keuting, ku' hk'o'am' na' mae' kan' kue' tí'ca na'. ¹³ A lawn un' meuh yawo un' duing meuh uí beus ri pé na' ko', hpaw pé ca' yawm' hk'ai' muk kon' Hkrit seubu na' ce. Hk'o' pé ploé' map' uí ri ku' kleuc' aen' a reu'.

¹⁴ Maet'maen' rangraen uí ri kaw tang heul' glue ri pé na', a na' meuh loé' pok ti pok. Uí hkuin' kaw yeuh ri meuh beus ri pé. Kopti ku' sum' is' uí na' meuh a tu' pé na', hpaw a ca' meuh hk'il' leumuil pé na'. Kon' na' htuk' ce ri hk'on'ro vahtu' pun makuiing' ri na' ce aw? Un' meuh, makuiing' na' htuk' ce ri hk'on'ro pun kon' ri na' ce. ¹⁵ Kop awn' na, ren' uí mae' kaw ri tuil' pé is' ku' kue' ri na' gawm'euc' mae' jawngkui' tu' uí na'. Uí lawn gawm baet ri leumeus' pé heun' ko', kaw pé baet ri leumeus' uí leng aw? ¹⁶ Yam pon heul' hawc' na', yawng pé un' pun uí ri meuh beus ri pé yeut. Daecti ngon' pé lah' uí cop' ri ti pé mae' hk'a' vok' na'. ¹⁷ Chi'lai uí ri ti pé ri cus' uí peue ti peue eun heul' ri pé aw? ¹⁸ Hk'o' uí Títas' eun heul' ri pé. Uí ku' cus' ec'awng' ti peue na' eun heul' mae' heun yeut. Títas' hkuin' eun tawp un' duing chi'lai ri ti ku' ti ri ceu ri pé aw? Yeuh ya kan' na' hk'a'naee hpum' ya na' seun' a puri na', un' meuh ka aw? Ya hot' yawo hk'a' ti hk'a' na', un' meuh ka aw?

¹⁹ Yam pon heul' hawc' na' ce na', hteum' pé ya lah' leukah' kah' nha' ri meun aw? Neumneum ka na' ko', leukah' ya nanggal' to'nha' Eun Peucawo' seun' peue ut' hk'a'naee Hkrit Eun na' ko'. Peue leumeus' uí na' pé, ku' yeuh ya na' ce ku' ceu ka meuh a punta kaw pé keuting

huk'hawn' na'. ²⁰ Kopti hki'keung ui' ri yam na' ui' ing' rot ri pe' na', pe' na' cang ra ri un' seun' ku' kuit ui', ui' ku na' cang ra ri un' seun' ku' kuit pe'. Ui' hki'keung ri na' pe' cang ra ri kleuc' leumeul puri, hkoemang' puri, seungeueng' peulel ri puri, hk'akcak' puri, peusah' nyoe puri, ra ri is' puri, hpum' lhung' hpum' keuting ri puri mae' yeuh ku' klu'klu' hkawo'hkawo' na'. ²¹ Ui' hki'keung ri yam na' ui' tang ing' rot ri pe' bae ti pok na', Peucawo' ui' na' kaw Eun nuic ui' tem nanggal' to'nhá' pe'. Ui' kaw pun ri hpum' lu nyawk' kopti peue heun' peue na' yeuh ce map', ce un' taws' hpum' fuin map' ri tec ku' hk'aw'jeuk, hk'a' len'cu na' mae' hk'a' hkuit'nawng'tang' ku' buih yeuh ce na'.

13

¹ Kaw ui' tang heul' glue ri pe' pok aen' a na' meuh a loe' pok ti pok. Hk'a'naee vang yeuh a'mu ri puri na', kah a ri kue' nang meuh sa'hki' ka lah' loe' peue.* ² Yam ing' glue ui' ri pe' lah' pok ti pok na', tuil' ui' ri uin' sati ri pe' hawc'. Maet'maen' yam un' ut' ui' mae' pe' na', ui' lah' a ri pe' bae, peue yeuh map' nanggal' aen' a na' ce a saec' meuh a'nhaw' hpaw ui' ca' kaw laee vel ce ³ kopti meuh a sum' nyu pe' sa'hki' ka lah' ui' Peucawo' Eun cu ui' Eun lah' leukah' ri na'. Hkrit hpaw Eun ca' kaw'ring kloe ri ku' kaw Eun yeuh ri pe' na'. Daecti ti'ca keuting Eun hk'a'naee muk pe' na'. ⁴ Hkrit Eun saec' na' pun ri tawk' ri yeum pang kleum' rawng'tawp' na' hk'a'naee hk'a' kaw'ring kloe ri ko', daecti maet'maen' a'yu im' Eun ri ti'ca Eun Peucawo' na'. Seun' awn' na, ya saec' na' kaw'ring kloe hk'a'naee

* **13:1** 13:1 Saw'n leukah' mun' 19:15. Paw'lu lah' eun leukah' ritroe aen' a na', a meuh kopti sum' tuh' eun peue nyu hot' ri ri yeuh seun' ku' lah' ka leukah' ritroe na'. Eun deun' peue yeuh map' na' ce loe' pok hawc'. Maet'maen', raen eun ri kaw ciyang peue un' taws' hpum' fuin map' ri na' ce.

Hkrit Eun na' ko', daecti punta kaw ya yeuh mhai' pe' na', ya kaw a'yu im' mae' Hkrit Eun hk'a'naee ti'ca Eun Peucawo' na'.

⁵ Pe' ci' cawng keutawn' un' keutawn' hk'a'naee hk'a' yum' ri na' sawng' caet ri nawk tu' ri na' meun reu'. Pe' lawn lawt pun hk'a' caet ri nawk na' ko', kaw pe' hkaem ri Yesu' Hkrit ut' Eun hk'a'naee ri. Daecti pe' lawn un' lawt pun hk'a' caet ri nawk na' ko', Yesu' Hkrit hpaw Eun ca' ut' hk'a'naee pe'. ⁶Ui' ku yum' kaw pe' yawng lawt pun ya hk'a' caet ri nawk aen' a yeut. ⁷Punta kaw pe' un' yeuh ku kleuc' na', ya hk'o' mun' ri Peucawo' Eun. Aen' a hkuin' meuh punta kaw peue pun ri nyu lawt pun ya hk'a' caet ri nawk na' hawc' na'. Daecti a meuh punta ya saec' na' seun' lawt un' pun ya hk'a' caet ri nawk na' ko', pe' kaw yeuh ku cawp' na'. ⁸Kopti hpaw ya ca' cang yeuh ku kaw ham'tap ku neumneum na', daecti yeuh ya pun ku neumneum na' palkoe. ⁹Ya saec' na' kaw'l'reng kloe kopti kaw'l'reng keuting pe' na' ko', ya ren'kawn. Punta kaw pe' htonnuk na', ya hk'o' mun' pun pe'. ¹⁰Kop awn' na, ui' tem' ri tuil' lawng aen' a ri pe' yam un' ut' ui' mae' pe' na'. Aen' a meuh punta yam ing' rot ui' ri pe' na', kaw ui' un' lo' an'nya Peucawo' tuil' Eun ri ui' na' reng ri pe' na'. An'nya aen' a meuh punta kaw a yeuh pe' huk'hawn', hpaw a ca' meuh punta kaw a yeuh pe' lulaic heul' na'.

Leukah' tisut'

¹¹Vang tisut' ka na', ec'awng' na' pe', sang' am'la pe'. Sawng' yeuh meun ri htonnuk reu'. Leuceng leukah' hk'o'hk'ang ui' na' reu'. Yeuh hpum' ri meuh ti meul' reu'. Ut' hk'a'naee hk'a' cumyen' na' reu'. Peucawo' ka hk'a' leumeus'keus mae' hk'a' cumyen' na' kaw Eun ut' mae' pe'.

¹² Yam hk'eup' puri na', gloh' tí puri hk'a'naee vang seunga' chak' na' reu'. ¹³ Peue Eun Peucawo' na' ce ku peue, ce lah' ri leunyeng ri pé'.

¹⁴ Kah mun' sin' Eun Cawo' Yesu' Hkrit, hk'a' leumeus'keus Eun Peucawo' na' mae' hk'a' yeuh a'mawo puri is' ka Cit' seunga' chak' na' kue' ri pé' gawm'euc' pé' reu'.

Plang
The New Testament in the Blang language of Myanmar

copyright © 2021 Wycliffe Bible Translators, Inc.

Language: Plang (Blang)

Contributor: Wycliffe Bible Translators, Inc.

All rights reserved.

2021-04-06

PDF generated using Haiola and XeLaTeX on 10 Sep 2021 from source files dated 10 Sep 2021

0468b0b5-acb2-59c4-92d3-4fa09a4d091c